



აკაკი წერეთლის სახელმწიფო
უნივერსიტეტის აკადემიური საბჭო

ACADEMIC BOARD OF AKAKI
TSERETELI STATE UNIVERSITY

თამარ მეფის ქ. № 59
მის: 4600, საქართველო, ქუთაისი

ტელ: (+995 331) 4 21 73 ფაქსი (+995 331) 4 38 33
ელ.ფოსტა atsu@atsu.edu.ge

აკაკი წერეთლის სახელმწიფო უნივერსიტეტი
აკადემიური საბჭო

7 აგვისტო, 2019

დადგენილება №83 (18/19)

**აწსუ საინჟინრო - ტექნოლოგიური ფაკულტეტის დოქტორანტურისა და
სადისერტაციო საბჭოს დებულების დამტკიცების შესახებ**

აკაკი წერეთლის სახელმწიფო უნივერსიტეტის საინჟინრო - ტექნოლოგიური ფაკულტეტის
დოქტორანტურისა და სადისერტაციო საბჭოს დებულება დამტკიცდეს თანდართული ფორმით.

აკადემიური საბჭოს
თავმჯდომარე, რექტორი:

პროფ. როლანდ კოპალიანი

**აკაკი წერეთლის სახელმწიფო უნივერსიტეტის
საინჟინრო-ტექნოლოგიური ფაკულტეტის
დოქტორანტურისა და სადისერტაციო საბჭოს დებულება**

ეს დებულება განსაზღვრავს აკაკი წერეთლის სახელმწიფო უნივერსიტეტის საინჟინრო-ტექნოლოგიურ ფაკულტეტზე (შემდგომში ფაკულტეტი) დოქტორანტურისა და სადისერტაციო საბჭოს ფუნქციონირების, სადოქტორო პროგრამების განხორციელებისა და დოქტორის აკადემიური ხარისხის მინიჭების პრინციპებსა და წესს.

მუხლი 1. დოქტორანტურა

- 1.1. „უმაღლესი განათლების შესახებ“ საქართველოს კანონის მე-2 მუხლის თანახმად დოქტორანტურა არის უმაღლესი აკადემიური განათლების მესამე საფეხური, რომელიც რეალიზდება დოქტორანტურის საგანმანათლებლო პროგრამით/ებით.
- 1.2. დოქტორანტურის საგანმანათლებლო პროგრამა - სასწავლო და სამეცნიერო-კვლევითი კომპონენტების ერთობლიობაა, რომლის სწავლის შედეგებიც შეესაბამება ეროვნული კვალიფიკაციების ჩარჩოს მე-8 დონისათვის განსაზღვრულ განზოგადებული სწავლის შედეგებს.
- 1.3. დოქტორანტი - პირი, რომელიც სწავლობს დოქტორანტურაში;
- 1.4. დოქტორი - უმაღლესი აკადემიური ხარისხია, რომელიც აკაკი წერეთლის სახელმწიფო უნივერსიტეტის საინჟინრო-ტექნოლოგიური ფაკულტეტის დოქტორანტურის საგანმანათლებლო პროგრამების კურსდამთავრებულს ენიჭება დისერტაციის დაცვის შემდეგ, ინჟინერიის მიმართულებებით.

მუხლი 2. სადისერტაციო საბჭო

- 2.1. ფაკულტეტის სადისერტაციო საბჭო არის დოქტორის აკადემიური ხარისხის მიმნიჭებელი ორგანო;
- 2.2. სადისერტაციო საბჭოს შემადგენლობაში შედის ფაკულტეტის ყველა პროფესორი და ასოცირებული პროფესორი. სადისერტაციო საბჭოს არგუმენტირებული შუამდგომლობის საფუძველზე უნივერსიტეტის აკადემიური საბჭოს თანხმობით სადისერტაციო საბჭოში შეიძლება შეყვანილი იქნას დოქტორის აკადემიური ხარისხის მქონე პირი, რომელიც არ არის ფაკულტეტის პროფესორი ან ასოცირებული პროფესორი;
- 2.3. სადისერტაციო საბჭო თავის საქმიანობას წარმართავს ფაკულტეტის საბჭოს მიერ შემუშავებული და უნივერსიტეტის აკადემიური საბჭოს მიერ დამტკიცებული წინამდებარე დებულების შესაბამისად;
- 2.4. სადისერტაციო საბჭო გადაწყვეტილებას იღებს საბჭოს სხდომაზე. სხდომა უფლებამოსილია მიიღოს გადაწყვეტილება, თუ მას ესწრება წევრთა საერთო რაოდენობის სულ მცირე 2/3. გადაწყვეტილების მისაღებად საჭიროა დამსწრეთა ხმების სულ მცირე 2/3;
- 2.5. სადისერტაციო საბჭო ირჩევს თავმჯდომარეს თავისი შემადგენლობიდან 3 (სამი) წლის ვადით, წევრთა საერთო რაოდენობის უმრავლესობით, რომელსაც ამტკიცებს აკადემიური საბჭო. ერთი და იგივე პირი თავმჯდომარედ შეიძლება არჩეულ იქნას ზედიზედ მხოლოდ ორჯერ ერთი და იგივე ფაკულტეტზე. თავმჯდომარის არჩევამდე საბჭოს პირველ სხდომას უძღვება ფაკულტეტის დეკანი;
- 2.6. სადისერტაციო საბჭოს თავმჯდომარის წარდგინებით საბჭო სიითი შემადგენლობის უმრავლესობით ირჩევს და ამტკიცებს სადისერტაციო საბჭოს მდივანს 3 (სამი) წლის ვადით;
- 2.7. სადისერტაციო საბჭოს სიით შემადგენლობის არანაკლებ 1/3-ის წერილობითი მოთხოვნის შემთხვევაში, საბჭოს თავმჯდომარე ვალდებულია მოიწვიოს რიგგარეშე სხდომა;
- 2.8. სადისერტაციო საბჭოს სხდომის მიმდინარეობა აისახება ოქმში, რომელსაც ხელს აწერენ საბჭოს თავმჯდომარე და მდივანი;
- 2.9. სადისერტაციო საბჭოს ნებისმიერი გადაწყვეტილება დოქტორანტს უნდა ეცნობოს წერილობით.

მუხლი 3. სადისერტაციო საბჭოს უფლებამოსილება

სადისერტაციო საბჭო:

- ირჩევს და უნივერსიტეტის აკადემიურ საბჭოს დასამტკიცებლად წარუდგენს სადისერტაციო საბჭოს თავმჯდომარეს;
- ამტკიცებს სადისერტაციო საბჭოს მდივანს;
- ადგენს დოქტორანტის სადისერტაციო ნაშრომის თემას და დასამტკიცებლად წარუდგენს უნივერსიტეტის რექტორს;
- ადგენს დოქტორანტის სამეცნიერო ხელმძღვანელის კანდიდატურას და დასამტკიცებლად წარუდგენს უნივერსიტეტის რექტორს;
- ნიშნავს და უნივერსიტეტის რექტორს დასამტკიცებლად წარუდგენს საექსპერტო კომისიას სადისერტაციო ნაშრომის წინასწარი განხილვისათვის;
- ნიშნავს და უნივერსიტეტის რექტორს დასამტკიცებლად წარუდგენს სადისერტაციო ნაშრომის შემფასებლებს (რეცენზენტებს);
- ადგენს და უნივერსიტეტის რექტორს დასამტკიცებლად წარუდგენს სადისერტაციო კომისიის შემადგენლობას;
- ადგენს და უნივერსიტეტის რექტორს დასამტკიცებლად წარუდგენს სადისერტაციო ნაშრომის დაცვის თარიღს;
- სადისერტაციო კომისიის დასკვნის საფუძველზე ანიჭებს დოქტორის აკადემიურ ხარისხს და დასამტკიცებლად წარუდგენს უნივერსიტეტის რექტორს.

მუხლი 4. სადისერტაციო საბჭოს თავმჯდომარის უფლებამოსილება

სადისერტაციო საბჭოს თავმჯდომარე საჭიროებისამებრ იწვევს და უძღვება საბჭოს სხდომებს.

მუხლი 5. სადისერტაციო საბჭოს მდივნის უფლებამოსილება

სადისერტაციო საბჭოს მდივანი უზრუნველყოფს საბჭოს ორგანიზაციულ საქმიანობას:

- აწარმოებს სადისერტაციო საბჭოს სხდომის ოქმებს უნივერსიტეტში საქმისწარმოების ერთიანი წესების შესაბამისად;
- ეხმარება თავმჯდომარეს ორგანიზაციული საკითხების მოგვარებაში;
- ხელმძღვანელობს საბჭოს არქივსა და პასუხიმგებელია საქმის წარმოებაზე;
- უზრუნველყოფს სადისერტაციო საბჭოს გადაწყვეტილების გამოქვეყნებას უნივერსიტეტის ვებ-გვერდზე.

მუხლი 6. სადოქტორო პროგრამების შემუშავება

6.1. სადოქტორო პროგრამების შემუშავება ხდება აწსუ-ს ხარისხის უზრუნველყოფის კონცეფციის დოკუმენტაციისა და აკადემიური საბჭოს N62(17/18) დადგენილების (აკაკი წერეთლის სახელმწიფო უნივერსიტეტში დოქტორანტურის წარმართვის ძირითადი პრინციპების განსაზღვრის შესახებ) შესაბამისად;

6.2. სადოქტორო პროგრამას ხელმძღვანელობს:

- აკაკი წერეთლის სახელმწიფო უნივერსიტეტის პროფესორი;
- აკაკი წერეთლის სახელმწიფო უნივერსიტეტის ასოცირებული პროფესორი;
- აკაკი წერეთლის სახელმწიფო უნივერსიტეტის ემერიტუსი;
- საქართველოს ავტორიზებული უნივერსიტეტის პროფესორი, რომელიც არის ფაკულტეტის სადისერტაციო საბჭოს წევრი;
- საზღვარგარეთის მაღალრეიტინგული უნივერსიტეტის პროფესორი, რომელიც არის ფაკულტეტის სადისერტაციო საბჭოს წევრი.

6.3. სადოქტორო პროგრამის განხორციელებაში მონაწილეობს:

- ფაკულტეტის პროფესორი ან ასოცირებული პროფესორი;

- ფაკულტეტის ემერიტუსი;
- პარტნიორი სასწავლო ან სამეცნიერო დაწესებულების მეცნიერებათა დოქტორი;
- სადოქტორო პროგრამით გათვალისწინებული შესაბამისი აკადემიური ხარისხის მქონე მოწვეული სპეციალისტი.

მუხლი 7. სადოქტორო პროგრამის კომპონენტები

- 7.1. დოქტორანტმა უნდა აითვისოს 180 კრედიტი. სადოქტორო პროგრამა მოიცავს სასწავლო და კვლევით კომპონენტებს. დოქტორანტურაში სასწავლო კომპონენტი შეადგენს კრედიტების საერთო რაოდენობის არაუმეტეს 1/3, დანარჩენი ეთმობა კვლევით კომპონენტს.
- 7.2. დოქტორანტურის სასწავლო კომპონენტი გულისხმობს დოქტორანტის დარგობრივ და მეთოდოლოგიურ დახელოვნებას და მასში შედის:
 - დარგობრივი კურსებისგან შემდგარი მოდული, რომელიც გულისხმობს სადისერტაციო თემიდან გამომდინარე სპეციალური და მომიჯნავე საგნის გაღრმავებულ შესწავლას. დარგობრივი კურსები აუცილებლად მოიცავს დარგის კვლევის თანამედროვე მეთოდებს;
 - სწავლების თანამედროვე მეთოდების მოდული, რასაც მოსდევს დოქტორანტის ჩართვა სწავლების პროცესში (პროფესორის ხელმძღვანელობით ლექციებისა და პრაქტიკული მეცადინეობების ჩატარება). ამ კომპონენტის დასრულების შემდეგ დოქტორანტი ფასდება იმ პროფესორის მიერ, რომელიც ხელმძღვანელობას უწევდა წარმოდგენილ მოდულს;
- 7.3. დოქტორანტის კვლევითი კომპონენტის აუცილებელი შემადგენელი ნაწილია კოლოკვიუმი. კოლოკვიუმი წარმოადგენს დოქტორანტის კვლევის შედეგების პრეზენტაციას, დოქტორანტის საქმიანობის სფეროში ახალი სამეცნიერო მიღწევების, პრობლემების, ლიტერატურის შეფასება-განხილვას, რასაც მოყვება სამეცნიერო დისკუსია. დოქტორანტი ვალდებულია სწავლების მეორე და მესამე წელს არანაკლებ ორჯერ მაინც გააკეთოს კოლოკვიუმზე პრეზენტაცია, მასთან სწავლების მეორე წელს არაუმეტეს ერთი კოლოკვიუმისა. კოლოკვიუმის შესაფასებლად გამოიყოფა ერთი ან ორი რეცენზენტი, მათი დადებითი რეცენზიის შემთხვევაში გამოიყოფა კომისია არანაკლებ 3 და არაუმეტეს 5 წევრის შემადგენლობით. კომისიის თითოეული წევრი კოლოკვიუმს აფასებს ან დადებითად, ან უარყოფითად. კოლოკვიუმი ითვლება შესრულებულად თუ მას დადებითად შეაფასებს კომისიის წევრთა ნახევარზე მეტი.
- 7.4. კვლევითი კომპონენტისათვის გათვალისწინებული 120 კრედიტის ათვისება დასტურდება სადისერტაციო ნაშრომის წარმატებულად დაცვის შედეგად.

მუხლი 8. დოქტორანტურაში ჩარიცხვის წესი

- 8.1. დოქტორანტობის კანდიდატი წარმოადგენს განაცხადს და გადის გამოცდებზე აკაკი წერეთლის სახელმწიფო უნივერსიტეტის საინჟინრო-ტექნოლოგიური ფაკულტეტის სადისერტაციო საბჭოს მიერ დადგენილი წესით სპეციალობასა და უცხო ენაში (B2 დონის დამადასტურებელი სერთიფიკატის არქონის შემთხვევაში);
- 8.2. ფაკულტეტის საგამოცდო კომისიის დადებითი გადაწყვეტილების შემთხვევაში უნივერსიტეტის რექტორი, დეკანის წარდგინებით, გამოსცემს დოქტორანტურაში კანდიდატის დოქტორანტად ჩარიცხვის შესახებ ინდივიდუალურ ადმინისტრაციულ-სამართლებრივ აქტს;
- 8.3. უნივერსიტეტი, დოქტორანტი, სადოქტორო პროგრამის ხელმძღვანელი და სამეცნიერო ხელმძღვანელი ჩარიცხვიდან მაქსიმუმ 2 თვის განმავლობაში ხელს აწერენ ხელშეკრულებას, რომელიც განსაზღვრავს ყველა მხარის ვალდებულებებსა და უფლებებს. ხელშეკრულების ნაწილია დოქტორანტის ინდივიდუალური გეგმა.

მუხლი 9. დოქტორანტის სამეცნიერო ხელმძღვანელი

- 9.1. ფაკულტეტი უზრუნველყოფს დოქტორანტს სამეცნიერო ხელმძღვანელით, უქმნის პირობებს სამეცნიერო კვლევაზე ორიენტირებული სამუშაოს ჩასატარებლად;
- 9.2. დისერტაციის სამეცნიერო ხელმძღვანელი კონტროლს უწევს ინდივიდუალური გეგმის შესრულებას;

- 9.3. დოქტორანტის სამეცნიერო ხელმძღვანელი შეიძლება იყოს სადისერტაციო საბჭოს წევრი, სადოქტორო პროგრამაში ჩართული პროფესორი, ემერიტუსი ან გამონაკლის შემთხვევაში ასოცირებული პროფესორი, უნივერსიტეტის აკადემიური საბჭოს მიერ მინიჭებული ერთჯერადი უფლებით;
- 9.4. სამეცნიერო ხელმძღვანელს უნდა ჰქონდეს დოქტორანტის სადისერტაციო თემასთან დაკავშირებული სამეცნიერო სფეროში კვლევის გამოცდილება და მნიშვნელოვანი სამეცნიერო პუბლიკაციები.
- 9.5. ერთი პროფესორი ან ემერიტუსი ერთდროულად შეიძლება იყოს არაუმეტეს სამი დოქტორანტის სამეცნიერო ხელმძღვანელი;
- 9.6. იმ შემთხვევაში, თუ სამეცნიერო ხელმძღვანელი უარს ამბობს ხელმძღვანელობაზე, ამის შესახებ მან სწავლების ნებისმიერ ეტაპზე დასაბუთებული განცხადება უნდა წარუდგინოს სადისერტაციო საბჭოს;
- 9.7. სამეცნიერო ხელმძღვანელის მიერ აკაკი წერეთლის სახელმწიფო უნივერსიტეტში დაკავებული აკადემიური თანამდებობის დატოვება არ იწვევს დოქტორანტის ხელმძღვანელობაზე უარის თქმას, თუ თანამდებობის დატოვების შემდეგ ფაკულტეტის სადისერტაციო საბჭო უახლოეს სხდომაზე მიიღებს გადაწყვეტილებას ფაკულტეტის საბჭოში მისი მოწვევის შესახებ. ამ შემთხვევაში უნივერსიტეტს, სამეცნიერო ხელმძღვანელსა და დოქტორანტს შორის ხელი მოეწერება ახალ ხელშეკრულებას, რომლითაც მხარეების ვალდებულებების გარდა განისაზღვრება ხელმძღვანელის შრომის ანაზღაურების პირობები.

მუხლი 10. დოქტორანტის ინდივიდუალური გეგმა

დოქტორანტის ინდივიდუალურ გეგმას ადგენს დოქტორანტის სამეცნიერო ხელმძღვანელი დოქტორანტთან შეთანხმებით. ინდივიდუალურ გეგმაში მოცემული უნდა იყოს კვლევის მიზანი, სადისერტაციო თემის მოკლე აღწერა, სასწავლო კომპონენტების შესრულების და კვლევის სავარაუდო გრაფიკი.

მუხლი 11. დოქტორანტის სტატუსის შეწყვეტა

სადისერტაციო საბჭოს გადაწყვეტილებით, რომელიც დასამტკიცებლად წარედგინება რექტორს დოქტორანტს შეიძლება დოქტორანტის სტატუსი შეუწყდეს უნივერსიტეტს, დოქტორანტსა და სამეცნიერო ხელმძღვანელს შორის დადებული ხელშეკრულებით გათვალისწინებული პირობების შეუსრულებლობისას.

მუხლი 12. სადისერტაციო ნაშრომისადმი წაყენებული მოთხოვნები

- 12.1. დისერტაცია უნდა ასახავდეს თეორიული და ექსპერიმენტული კვლევის მეცნიერულად დასაბუთებულ ახალ შედეგებს, რომელსაც წვლილი შეაქვს დარგის განვითარებაში;
- 12.2. თუ დოქტორანტი ჩართულია კვლევით ჯგუფში, მაშინ ნათლად უნდა ჩანდეს მისი წვლილი საერთო კვლევის საკითხებში;
- 12.3. დისერტაცია შესრულებული უნდა იყოს ქართულ ენაზე. მას უნდა ახლდეს დისერტაციის ძირითადი შინაარსის ამსახველი მოკლე ვერსია (ავტორეფერატი) ქართულ და ერთ-ერთ ევროპულ (ინგლისური, გერმანული, ფრანგული) ენაზე;
- 12.4. განსაკუთრებულ შემთხვევებში სხვა ენაზე დისერტაციის შესრულების საკითხს წყვეტს ფაკულტეტის სადისერტაციო საბჭო;
- 12.5. ნაშრომის უცხო ენაზე შესრულების შემთხვევაში, კვლევის ძირითადი შედეგები წარმოდგენილი უნდა იყოს ქართულ ენაზე;
- 12.6. სადისერტაციო ნაშრომის მოცულობას, ფორმატს და სხვა მონაცემებს განსაზღვრავს ფაკულტეტის სადისერტაციო საბჭო სათანადო გადაწყვეტილებით;
- 12.7. დოქტორანტის მიერ სადისერტაციო ნაშრომის დაცვა ხდება ფაკულტეტის სადისერტაციო საბჭოს მიერ გამოყოფილი და რექტორის მიერ დამტკიცებული სადისერტაციო კომისიის წინაშე;
- 12.8. სადისერტაციო ნაშრომის სადისერტაციო კომისიის წინაშე გატანის პროცედურები მოიცავს:
 - სადისერტაციო ნაშრომის, ავტორეფერატისა და სხვა შესაბამისი დოკუმენტაციის წარდგენა.

- სადისერტაციო ნაშრომისა და ავტორეფერატის წინასწარი ექსპერტიზა საექსპერტო კომისიის მიერ.
- სადისერტაციო ნაშრომისა და ავტორეფერატის შეფასება ოფიციალური შემფასებლების (რეცენზენტების) მიერ.

მუხლი 13. სადისერტაციო ნაშრომის, ავტორეფერატისა და სხვა შესაბამისი დოკუმენტაციის წარდგენა

სადისერტაციო ნაშრომის, ავტორეფერატისა და სხვა შესაბამისი დოკუმენტაციის წარდგენა მოიცავს:

- 13.1 სადისერტაციო ნაშრომი და ავტორეფერატი
სადისერტაციო ნაშრომი და ავტორეფერატი სადისერტაციო საბჭოს გადაეცემა ოთხ აკინძულ და ერთ ელექტრონულ ეგზემპლარად;
- 13.2 სადოქტორო პროგრამით გათვალისწინებული არაუმეტეს 60 სასწავლო კრედიტის დაგროვების დამადასტურებელი დოკუმენტი;
სადოქტორო პროგრამით სასწავლო კომპონენტისათვის გათვალისწინებული არაუმეტეს 60 კრედიტის ათვისების დამადასტურებელი კრებსითი უწყისის წარდგენა ფაკულტეტის სადისერტაციო საბჭოში. კრებსით უწყისს გასცემს დოქტორანტურის განყოფილება და ხელს აწერენ უნივერსიტეტის რექტორი და დოქტორანტურის განყოფილების უფროსი.
- 13.3 სადოქტორო პროგრამის კვლევითი კომპონენტით გათვალისწინებული არანაკლებ ორი კოლოქვიუმის შესრულების ოქმი.
კოლოქვიუმების შესრულება დასტურდება დოქტორანტურის განყოფილების მიერ გაცემული ცნობით არანაკლებ ორი კოლოქვიუმის შესრულების შესახებ, ცნობას ხელს აწერენ უნივერსიტეტის რექტორი და დოქტორანტურის განყოფილების უფროსი. კოლოქვიუმების შეფასების მეთოდიკა განისაზღვრება საქართველოს განათლებისა და მეცნიერების მინისტრის 2007 წლის 5 იანვრის №3 ბრძანების მე-4 მუხლის მე-17 პუნქტით. აკაკი წერეთლის სახელმწიფო უნივერსიტეტის აკადემიური საბჭოს 2017 წლის 17 ივლისი №57(16/17) დადგენილებით;
- 13.4 სადისერტაციო თემასთან დაკავშირებული გამოგონების (ასეთის არსებობის შემთხვევაში) დამადასტურებელი ოფიციალური დოკუმენტი;
- 13.5 გამოქვეყნებული სამეცნიერო შრომების, სამეცნიერო კონფერენციებისა და ფორუმების ჩამონათვალი (სადაც მოხსენებული იყო სადისერტაციო ნაშრომის ძირითადი შედეგები), რისი შესრულებაც დასტურდება შესაბამისი ნაშრომის გამოქვეყნებით და მისი ორიგინალის წარმოდგენით.
სადისერტაციო ნაშრომის ძირითადი შედეგები გამოქვეყნებული უნდა იქნას დაცვამდე არანაკლებ სამი სამეცნიერო ნაშრომის სახით რეცენზირებად ჟურნალებში. რეცენზირებადი ჟურნალების სარეკომენდაციო ნუსხას ადგენს ფაკულტეტის სადისერტაციო საბჭო და დასამტკიცებლად წარედგინება აკადემიურ საბჭოს. წარმოდგენილი სამი სამეცნიერო ნაშრომებიდან ერთი აუცილებლად უნდა იყოს გამოქვეყნებული საერთაშორისო ბაზებში განთავსებულ ჟურნალებში.
დისერტანტმა შეიძლება წარმოადგინოს მონოგრაფიაც (მონოგრაფია არის სადისერტაციო ნაშრომთან დაკავშირებული პრობლემატიკის აღწერის, მათი გადაწყვეტის გზებისა და მეთოდების, მიღწეული კვლევითი შედეგების გამოცემა ბეჭდვითი სახით, ISBN და ISSN კოდით, არანაკლებ 100 ეგზემპლარი), ცნობა სტამბიდან, თანხის გადახდის ქვითარი;
- 13.6 დოქტორანტის სამეცნიერო ხელმძღვანელის დასკვნა იმის შესახებ, რომ ნაშრომი მზად არის საჯარო განხილვაზე წარსადგენად;
- 13.7 ფაკულტეტების სადისერტაციო საბჭოების მიერ განსაზღვრული რაოდენობის სტატიების შეფასება უნდა მოხდეს ანონიმი ექსპერტის მიერ. ანონიმი ექსპერტის შეფასება არაა საჭირო, თუ ერთი მაინც სტატია გამოქვეყნებულია: ა) Scopus, Web of Science, Science Direct ან ERIH PLUS-ის ბაზებში ინდექსირებულ სამეცნიერო ჟურნალებში. ბ) დადებითი იმპაქტ ფაქტორის მქონე სამეცნიერო ჟურნალებში.
- 13.8 დასრულებული სადისერტაციო ნაშრომის განხილვის ოქმი სადოქტორო პროგრამის წარმმართველი დეპარტამენტის სხდომის მიერ.

მუხლი 14. სადისერტაციო ნაშრომისა და ავტორეფერატის წინასწარი ექსპერტიზა საექსპერტო კომისიის მიერ

- 14.1. ფაკულტეტის სადისერტაციო საბჭო, დისერტაციის წინასწარი განხილვისათვის, ფაკულტეტის დეკანთან შეთანხმებით ადგენს საექსპერტო კომისიას არაუმეტეს 3 წევრის და არანაკლებ 2 წევრის რაოდენობით და დასამტკიცებლად წარუდგენს უნივერსიტეტის რექტორს. ოფიციალური ექსპერტების რაოდენობა და მათი შრომის შინაარსი განისაზღვრება აკაკი წერეთლის სახელმწიფო უნივერსიტეტის აკადემიური საბჭოს 2007 წლის 5 სექტემბრის №1 დადგენილებით, მუხლი 19;
- 14.2. ოფიციალური ექსპერტიზის ამოცანებია:
 - სადისერტაციო ნაშრომის და ავტორეფერატის შესაბამისობის დადგენა სადისერტაციო საბჭოს მოთხოვნებთან;
 - სადისერტაციო ნაშრომის საჯარო განხილვის უზრუნველყოფა;
- 14.2. საექსპერტო კომისიაში შეიძლება შევიდეს სადისერტაციო თემის შესაბამისი დარგის დოქტორის აკადემიური ხარისხის მქონე პირი, რომელსაც აქვს მნიშვნელოვანი გამოკვლევები სადისერტაციო თემის მიმართულებით;
- 14.3. სადისერტაციო ნაშრომის განხილვა ტარდება საექსპერტო კომისიის მიერ განსაზღვრულ სამეცნიერო სემინარზე აკაკი წერეთლის სახელმწიფო უნივერსიტეტში, ან პარტნიორ სასწავლო ან სამეცნიერო დაწესებულებაში;
- 14.4. საექსპერტო კომისიამ დასკვნა უნდა წარმოადგინოს 45 დღის ვადაში;
- 14.5. საექსპერტო კომისიის უარყოფითი დასკვნის შემთხვევაში დისერტანტს ეძლევა უფლება 6 თვის ვადაში ხელახლა წარადგინოს დისერტაციის შესწორებული ვარიანტი.

მუხლი 15. სადისერტაციო ნაშრომისა და ავტორეფერატის შეფასება ოფიციალური შემფასებლების (რეცენზენტების) მიერ

- 15.1. საექსპერტო კომისიის დადებითი დასკვნის შემთხვევაში სადისერტაციო საბჭო სადოქტორო პროგრამის ხელმძღვანელთან და დეკანთან შეთანხმების შემდეგ უნივერსიტეტის რექტორს დასამტკიცებლად წარუდგენს ორ ან სამ შემფასებელს (რეცენზენტს). ოფიციალური შემფასებლის (რეცენზენტი) შერჩევისა და შრომის შინაარსი განისაზღვრავრება აკაკი წერეთლის სახელმწიფო უნივერსიტეტის აკადემიური საბჭოს 2007 წლის 5 სექტემბრის №1 დადგენილებით მუხლი 20 და აკაკი წერეთლის სახელმწიფო უნივერსიტეტის აკადემიური საბჭოს 2014 წლის 22 დეკემბრის №40(14/15) დადგენილებით.
- 15.2. შემფასებლად (რეცენზენტად) ინიშნება სადისერტაციო ნაშრომის თემატიკის შესაბამისი მიმართულების დოქტორის აკადემიური ხარისხის (ან მასთან გათანაბრებული სამეცნიერო ხარისხის) მქონე პირი, რომელიც აკმაყოფილებს ერთ-ერთს მაინც ქვემოთ ჩამოთვლილი პირობებიდან:
 - არის ავტორიზებული უნივერსიტეტის პროფესორი;
 - არის ავტორიზებული უნივერსიტეტის ასოცირებული პროფესორი და ფლობს მეცნიერებათა დოქტორის სამეცნიერო ხარისხს;
 - არის საჯარო სამართლის იურიდიული პირი სამეცნიერო-კვლევითი ინსტიტუტის მთავარი მეცნიერი-თანამშრომელი;
 - არის საჯარო სამართლის იურიდიული პირი სამეცნიერო-კვლევითი ინსტიტუტის უფროსი მეცნიერ-თანამშრომელი და ფლობს მეცნიერებათა დოქტორის სამეცნიერო ხარისხს;
 - არის საქართველოს მეცნიერებათა ეროვნული აკადემიის ნამდვილი წევრი ან წევრ-კორესპოდენტი;
 - არის საზღვარგარეთის მაღალრეიტინგული უნივერსიტეტის პროფესორი;
 - არის ავტორიზებული უნივერსიტეტის ემერიტუსი;
- 15.2¹. ფაკულტეტის სადისერტაციო საბჭოს არგუმენტირებული მოთხოვნის საფუძველზე, უნივერსიტეტის აკადემიური საბჭოს გადაწყვეტილებით სადისერტაციო ნაშრომის ერთ-ერთ რეცენზენტად (შემფასებლად) შეიძლება დაინიშნოს ავტორიზებული უნივერსიტეტის ასოცირებული პროფესორი, ან საჯარო სამართლის იურიდიული პირი სამეცნიერო-კვლევითი

- ინსტიტუტის ან ავტორიზებული უნივერსიტეტის უფროსი მეცნიერ-თანამშრომელი (აკადემიური დოქტორი), რომელსაც სადისერტაციო ნაშრომის მიმართულებით ბოლო 5 წლის განმავლობაში გამოქვეყნებული აქვს არანაკლებ 3 ნაშრომისა მაღალრეიტინგულ სამეცნიერო ჟურნალებში;
- 15.3. რეცენზენტი არ შეიძლება იყოს დოქტორანტის მიერ შესრულებულ ნაშრომთან თანაავტორი, იმ სამეცნიერო ჯგუფის წევრი, სადაც შესრულდა სადოქტორო პროგრამა. აგრეთვე იმ ქვედანაყოფის წევრი, სადაც მუშაობს დოქტორანტი ან დოქტორანტზე თანამდებობრივად დამოკიდებული პირი;
 - 15.4. დაუშვებელია, რომ რეცენზენტები იყვნენ ერთი ორგანიზაციის ერთი და იგივე ქვედანაყოფის თანამშრომლები;
 - 15.5. რეცენზენტებს ეგზავნებათ დისერტაცია და ავტორეფერატი. შემფასებლები სადისერტაციო საბჭოს წარუდგენენ სადისერტაციო ნაშრომის წერილობით შეფასებას (რეცენზიას) ნაშრომის მიღებიდან არა უგვიანეს 2 თვისა;
 - 15.6. რეცენზია სადისერტაციო ნაშრომის შეფასებასთან ერთად უნდა შეიცავდეს შესაბამის რეკომენდაციას ნაშრომის დაცვაზე +დაშვების, ან შესასწორებლად დოქტორანტისათვის უკან დაბრუნების, ან კიდევ დაცვაზე უარის თქმის შესახებ;
 - 15.7. თუ შემფასებელთაგან ნახევარზე მეტი უარყოფითად შეაფასებს დისერტაციას, დისერტაცია დაცვაზე არ იქნება დაშვებული;
 - 15.8. ორი შემფასებლიდან ერთის უარყოფითი დასკვნის შემთხვევაში სადისერტაციო საბჭო 10 დღის ვადაში გამოყოფს მესამე შემფასებელს;
 - 15.9. სადისერტაციო ნაშრომის რეცენზენტს (შემფასებელს) გამოეწერება შესაბამისი ანაზღაურება;
 - 15.10. თუ დისერტაცია არ იქნა დაშვებული დაცვაზე, სადისერტაციო საბჭოს გადაწყვეტილებით, დოქტორანტს უფლება ეძლევა დამატებით იმუშაოს დისერტაციაზე და ხელახლა წარუდგინოს საბჭოს 1 წლის ვადაში. წინააღმდეგ შემთხვევაში დოქტორანტი დაცვაზე არ დაიშვება;
 - 15.11. შესწორებული ნაშრომის ისევ უარყოფითად შეფასების შემთხვევაში დოქტორანტის ნაშრომი დასაცავად არ მიიღება;

მუხლი 16. სადისერტაციო კომისია

- 16.1. ოფიციალური შემფასებლების (რეცენზენტების) დადებითი შეფასების შემთხვევაში ფაკულტეტის სადისერტაციო საბჭო განსაზღვრავს სადისერტაციო კომისიას, რომელიც დასამტკიცებლად წარედგინება რექტორს.

სადისერტაციო კომისიის შემადგენლობა განისაზღვრება აკაკი წერეთლის სახელმწიფო უნივერსიტეტის აკადემიური საბჭოს 2007 წლის 5 სექტემბრის №1 დადგენილების მუხლი 21 - ით, აკაკი წერეთლის სახელმწიფო უნივერსიტეტის აკადემიური საბჭოს 2009 წლის 6 ნოემბრის № 17 (09/10) დადგენილებით, აკაკი წერეთლის სახელმწიფო უნივერსიტეტის აკადემიური საბჭოს 2015 წლის 7 მაისის №61 (14/15) და აკაკი წერეთლის სახელმწიფო უნივერსიტეტის აკადემიური საბჭოს 2009 წლის 6 ნოემბრის № 17 (09/10) დადგენილებებით;
- 16.2. რეცენზენტების მიერ სადისერტაციო ნაშრომის დასაცავად დაშვების შემთხვევაში, სადისერტაციო საბჭოს თავმჯდომარე სადოქტორო პროგრამის ხელმძღვანელთან კონსულტაციისა და დეკანთან შეთანხმების საფუძველზე, სადისერტაციო ნაშრომის დაცვის წარმართვის მიზნით, ქმნის სადისერტაციო კომისიის შემადგენლობას და დასამტკიცებლად წარუდგენს უნივერსიტეტის რექტორს;
- 16.3. სხვა უმაღლესი სასწავლებლებიდან მოწვეულ სადისერტაციო კომისიის წევრს გამოეწერება შესაბამისი ანაზღაურება;
- 16.4. სადისერტაციო საბჭოს თავმჯდომარის ვიზირების შემდეგ გამოიციემა ავტორეფერატი და ეგზავნება სადისერტაციო საბჭოს მიერ განსაზღვრულ ადრესატებს;
- 16.5. სადისერტაციო კომისია იქმნება სულ მცირე 6 და მაქსიმუმ 12 პირის შემადგენლობით, რომელთაც აქვს ხმის მიცემის უფლება;
- 16.6. სადისერტაციო კომისია უფლებამოსილია გაეცნოს სადისერტაციო ნაშრომთან დაკავშირებით შემოსულ წერილობით გამოხმაურებებს;

- 16.7. სადისერტაციო კომისიის წევრად არჩეული უნდა იქნას შესაბამისი დარგის დოქტორის აკადემიური ხარისხის (ან მასთან გათანაბრებული სამეცნიერო ხარისხის) მქონე სპეციალისტი. კომისიის წევრთა არანაკლებ 2/3 უნდა აკმაყოფილებდეს ერთ-ერთს მაინც მე-15 მუხლის მე-2 პუნქტში ჩამოთვლილ პირობებს შორის. ფაკულტეტის სადისერტაციო საბჭოს გადაწყვეტილებით შესაძლებელია კომისიის წევრთა არანაკლებ 1/2 აკმაყოფილებდეს ერთ-ერთს მაინც მე-15 მუხლის მე-2 პუნქტში ჩამოთვლილ პირობებს შორის. სამეცნიერო ხელმძღვანელი და შემფასებლები (რეცენზენტები) კომისიის მუშაობაში მონაწილეობენ სათათბირო ხმის უფლებით. სადისერტაციო კომისიის შემადგენლობაში შეიძლება შეყვანილ იქნან დოქტორის აკადემიური ხარისხის მქონე დარგის სპეციალისტებიც, რომლებიც არ არიან ფაკულტეტის სადისერტაციო საბჭოს წევრები. სადისერტაციო კომისიის შემადგენლობის არანაკლებ 1/3 - სა უნდა იქნეს სადისერტაციო საბჭოს წევრი. იმ შემთხვევაში, თუ ობიექტური მიზეზების გამო ზემოაღნიშნული პრინციპებით სადისერტაციო კომისიის კომპლექტაცია შეუძლებელია, საკითხს შექმნილი გარემოებების გათვალისწინებით წყვეტს უნივერსიტეტის აკადემიური საბჭო;
- 16.8. სადისერტაციო კომისიის შემადგენლობაში უნდა შედიოდეს სხვა უმაღლესი სასწავლებლებიდან და კვლევითი დაწესებულებებიდან მოწვეული არანაკლებ ორი პირი, რომლებიც არ არიან ფაკულტეტის სადისერტაციო საბჭოს წევრები;
- 16.9. სადისერტაციო კომისიას ხელმძღვანელობს კომისიის თავმჯდომარე, რომელიც შეიძლება იყოს პირი, რომელიც აკმაყოფილებს მე-20 მუხლის მე-2 პუნქტში ჩამოთვლილ პირობებს შორის ერთ-ერთს მაინც.
- 16.10. სადისერტაციო კომისიის სხდომა უფლებამოსილად ითვლება, თუ მის მუშაობაში მონაწილეობს კომისიის შემადგენლობის არანაკლებ 2/3-ისა;
- 16.11. დოქტორანტი სადისერტაციო კომისიის დამტკიცების შემდეგ, ერთი კვირის ვადაში უზრუნველყოფს კომისიის თითოეულ წევრს სადისერტაციო ნაშრომით და ავტორფერატით.

მუხლი 17. დისერტაციის დაცვა

- 17.1. დისერტანტის მიერ სადისერტაციო ნაშრომის დაცვა ხდება საჯაროდ, ფაკულტეტის სადისერტაციო საბჭოს მიერ გამოყოფილი სადისერტაციო კომისიის წინაშე.
- 17.2. დისერტაციის დაცვა ხდება იმავე ან მომდევნო სემესტრში, რომელშიც დოქტორანტი დაასრულებს მასზე მუშაობას.
- 17.3. დისერტაციის დაცვა ინიშნება სადისერტაციო კომისიის დამტკიცებიდან არაუადრეს 4 კვირის ვადაში. დაცვის თარიღს სადისერტაციო საბჭოს თავმჯდომარის წარდგინებით ამტკიცებს უნივერსიტეტის რექტორი.
- 17.4. დაცვის ენა არის ქართული, თუ სადისერტაციო საბჭოს გადაწყვეტილებით სხვა რამ არ არის დადგენილი.
- 17.4. დაცვის მსვლელობა და მიღებული გადაწყვეტილება აისახება ოქმში, რომელსაც ხელს აწერენ სადისერტაციო კომისიის თავმჯდომარე და მდივანი.
- 17.5. დისერტაციის დაცვა შედგება შემდეგი პროცედურებისაგან:
- დოქტორანტის მოხსენება (არაუმეტეს 30 წუთისა);
 - შემფასებლების მიერ რეცენზიების საჯარო წაკითხვა;
 - სამეცნიერო დისკუსია;
 - სადისერტაციო კომისიის დახურული სხდომა – სადისერტაციო ნაშრომის შესაფასებლად;
 - სადისერტაციო ნაშრომის შეფასების გამოცხადება.
- 17.6. დისერტაციის დაცვის მოწყობა შესაძლებელია ერთი რეცენზენტის საპატიო მიზეზით დაუსწრებლობის შემთხვევაში, თუ მისი რეცენზია დადებითია. რეცენზენტი, რომლის შეფასება უარყოფითია და დაცვას ვერ ესწრება, დაცვა გადაიდება;
- 17.7. კომისიის ერთ სხდომაზე შეიძლება ჩატარდეს მხოლოდ ერთი დისერტაციის დაცვა;
- 17.8. დისერტაციის დაცვები ტარდება აკადემიური წლის განმავლობაში თვეში არაუმეტეს ორჯერ;
- 17.9. სადისერტაციო ნაშრომის დაცვა უნდა მოხდეს ნაშრომის სადისერტაციო საბჭოში წარდგენის დღიდან 6 თვის განმავლობაში.

მუხლი 18. სადისერტაციო ნაშრომის საბოლოო შეფასება

18.1. სადისერტაციო კომისიის მიერ სადისერტაციო ნაშრომის შეფასების წესი განისაზღვრება საქართველოს განათლებისა და მეცნიერების 2017 წლის 5 იანვრის №3 ბრძანების მე-4 მუხლის მე-17 პუნქტით, აკაკი წერეთლის სახელმწიფო უნივერსიტეტის აკადემიური საბჭოს 2009 წლის 6 ნოემბრის № 17 (09/10) დადგენილებით.

18.2. დისერტაციის შეფასების კრიტერიუმებია:

- საკვლევი თემის აქტუალობა და მეცნიერული სიახლე;
- კვლევის მეთოდების გამოყენების სათანადო დონე, კვლევის საგანთან და ობიექტებთან მათი შესაბამისობა;
- მეცნიერების მოცემული დარგის განვითარებაში დისერტანტის მიერ შეტანილი წვლილი;

18.3. სადისერტაციო ნაშრომი ფასდება სადისერტაციო კომისიის მიერ დახურულ სხდომაზე სამეცნიერო დისკუსიის დასრულების შემდეგ. დისერტაციისა და დაცვის შეფასებების საფუძველზე სადისერტაციო კომისია ღებულობს საბოლოო შეფასებას.

18.4. საბოლოო შეფასება ხდება შემდეგი სისტემის მიხედვით:

დადებითი შეფასებებია:

- ა) ფრიადი (summa cum laude) - შესანიშნავი ნაშრომი;
- ბ) ძალიან კარგი (magna cum laude) - შედეგი, რომელიც წაყენებულ მოთხოვნებს ყოველმხრივ აღემატება;
- გ) კარგი (cum laude) - შედეგი, რომელიც წაყენებულ მოთხოვნებს აღემატება;
- დ) საშუალო (bene) - შედეგი, რომელიც წაყენებულ მოთხოვნებს ყოველმხრივ აკმაყოფილებს;
- ე) დამაკმაყოფილებელი (rite) - შედეგი, რომელიც ხარვეზების მიუხედავად, წაყენებულ მოთხოვნებს მაინც აკმაყოფილებს;

უარყოფითი შეფასებებია:

- ვ) არადამაკმაყოფილებელი (insufficienter) - შედეგი, რომელიც წაყენებულ მოთხოვნებს მნიშვნელოვანი ხარვეზების გამო ვერ აკმაყოფილებს;
- ზ) სრულიად არადამაკმაყოფილებელი (sub omni canone) - შედეგი, რომელიც წაყენებულ მოთხოვნებს სრულიად ვერ აკმაყოფილებს.

18.5. კომისიის თითოეული წევრი დისერტაციას აფასებს ამ მუხლის მე-3 პუნქტში მოყვანილი სისტემით;

18.6. ამ მუხლის მე-4 პუნქტის:

- „ა“ - „ე“ ქვეპუნქტებით გათვალისწინებული საბოლოო შეფასების მიღების შემთხვევაში დოქტორანტს ენიჭება დოქტორის აკადემიური ხარისხი;
- „ვ“ ქვეპუნქტით გათვალისწინებული საბოლოო შეფასების მიღების შემთხვევაში დოქტორანტს ენიჭება ერთი წლის განმავლობაში გადამუშავებული სადისერტაციო ნაშრომის წარდგენის უფლება;
- „ზ“ ქვეპუნქტით გათვალისწინებული საბოლოო შეფასების მიღების შემთხვევაში დოქტორანტი კარგავს იგივე სადისერტაციო ნაშრომის წარდგენის უფლებას.

18.7. დისერტაცია ითვლება დაცულად, თუ მას სადისერტაციო კომისიის დამსწრე შემადგენლობის არანაკლებ 2/3-ისა შეაფასებს დადებითად;

18.8. სადისერტაციო კომისიის თავმჯდომარე დოქტორანტს კომისიის დასაბუთებულ გადაწყვეტილებას აცნობებს ზეპირად;

18.9. სადისერტაციო ნაშრომის წარმატებულად დაცვის შემთხვევაში ფაკულტეტის სადისერტაციო საბჭო უნივერსიტეტის რექტორს დასამტკიცებლად წარუდგენს პროექტს დისერტანტისათვის დოქტორის აკადემიური ხარისხის მინიჭების შესახებ.

18.10. უნივერსიტეტის რექტორის მიერ აკადემიური ხარისხის მინიჭების შესახებ ბრძანების გამოცემის შემთხვევაში კვლევითი კომპონენტის არანაკლებ 120 კრედიტი ითვლება ათვისებულად.

მუხლი 19. დისერტაციის გამოქვეყნება

დოქტორანტი ვალდებულია დისერტაციის დაცვის შემდეგ არა უგვიანეს 3 თვის ვადაში გამოაქვეყნოს დისერტაცია ბეჭდური ან ელექტრონული ფორმით. წინააღმდეგ შემთხვევაში მასზე დოქტორის აკადემიური ხარისხის დამადასტურებელი დიპლომი არ გაიცემა.

მუხლი 20. დოქტორის აკადემიური ხარისხის დამადასტურებელი დიპლომი

- 20.1. აკაკი წერეთლის სახელმწიფო უნივერსიტეტის დოქტორის აკადემიური ხარისხის მინიჭებას ადასტურებს დიპლომი;
- 20.2. დიპლომი გაიცემა არაუადრეს 3 თვის ვადაში დისერტაციის დაცვის შემდეგ. დიპლომის გაცემამდე დოქტორანტს ეძლევა შესაბამისი ცნობა აკადემიური ხარისხის მინიჭების შესახებ;
- 20.3. დიპლომში აღნიშნულია სადისერტაციო საბჭოს დასახელება, დაცვის თარიღი და სპეციალობის დასახელება;
- 20.4. დიპლომი გაიცემა დისერტაციის გამოქვეყნების შემდეგ. დიპლომს ხელს აწერს უნივერსიტეტის რექტორი, ფაკულტეტის დეკანი და სადისერტაციო საბჭოს თავმჯდომარე. დიპლომი დასტურდება უნივერსიტეტის ბეჭდით;
- 20.4.1. სადისერტაციო ნაშრომის დაცვიდან არაუგვიანეს ორი კვირისა სადისერტაციო ნაშრომი უნდა განთავსდეს უნივერსიტეტის საიტზე;
- 25.5. დიპლომის ასლი ინახება უნივერსიტეტის არქივში.

მუხლი 21. დოქტორის აკადემიური ხარისხის ბათილობა

21.1 დოქტორის აკადემიური ხარისხი დოქტორს ჩამოერთმევა ფაკულტეტის სადისერტაციო საბჭოს გადაწყვეტილებით აკადემიური პატიოსნების ნორმების (სადისერტაციო ნაშრომში გაყალბებული მონაცემების გამოყენება ან პლაგიატი) დარღვევის შემთხვევაში.

მუხლი 22. დოქტორანტურა პარტნიორი უნივერსიტეტის მონაწილეობით

22.1. სადოქტორო პროგრამის განხორციელება პარტნიორი უნივერსიტეტის მონაწილეობით წესრიგდება ამ უნივერსიტეტთან დადებული შეთანხმებით თანამშრომლობისა და ერთობლივი დოქტორანტურის შესახებ.

უნივერსიტეტთაშორის სადოქტორო პროგრამის ფორმებია:

- ერთობლივი სწავლების ორგანიზება;
 - დოქტორანტის თანახელმძღვანელობა;
 - ერთობლივი ხარისხის მინიჭება
- 22.2. პარტნიორი უნივერსიტეტის მონაწილეობის შემთხვევაში დოქტორანტურაში ჩარიცხვის კანდიდატი უნდა აკმაყოფილებდეს ორივე უნივერსიტეტის დოქტორანტურაში მიღების წინაპირობებს;
 - 22.3. განცხადებას, ამ დებულებით გათვალისწინებულ საბუთებთან ერთად, უნდა ერთვოდეს პარტნიორი უნივერსიტეტის შესაბამისი დარგის პროფესორის თანხმობა თემის თანახელმძღვანელობაზე;
 - 23.4. პარტნიორი უნივერსიტეტის მონაწილეობის შემთხვევაში დისერტაციას ერთობლივად უნდა უხელმძღვანელონ აწსუ-ის საინჟინრო-ტექნოლოგიური ფაკულტეტის და პარტნიორი უნივერსიტეტის პროფესორებმა. აუცილებელია ორივე მხარის პროფესორის დასკვნა. დისერტაციის დაცვას ერთ-ერთი ხელმძღვანელი მაინც უნდა ესწრებოდეს;
 - 22.5. თუ სადისერტაციო საქმის წარმოება უპირატესად პარტნიორ უნივერსიტეტში მიმდინარეობს, მოქმედებს პარტნიორი უნივერსიტეტის დოქტორანტურის დებულების პირობები;
 - 22.6. დოქტორის აკადემიური ხარისხის დამადასტურებელ დოკუმენტს გასცემს ის უნივერსიტეტი, რომელშიც დაცული იქნა დისერტაცია პარტნიორი უნივერსიტეტის მითითებით;
 - 22.7. დისერტაცია წარმოდგენილი უნდა იქნას ქართულად და პარტნიორი უნივერსიტეტის სამუშაო ენაზე. იგივე წესი ხორციელდება დაცვასთან დაკავშირებით;

22.8. დოქტორანტურის დაფინანსება ხორციელდება სახელმწიფო გრანტის, პარტნიორი უნივერსიტეტების დაფინანსებით, სტიპენდიებით, ქველმოქმედებისა და თვითდაფინანსების ფორმით.

მუხლი 23. დებულებაში ცვლილებების შეტანის წესი

წინამდებარე დებულებაში დამატებისა და ცვლილებების შეტანის შესახებ წინადადებების დასმის უფლება აქვს სადისერტაციო საბჭოს ნებისმიერ წევრს. დასაბუთებულ წინადადებას განიხილავს სადისერტაციო საბჭო უახლოეს სხდომაზე და დადებითი გადაწყვეტილების შემთხვევაში განსახილველად წარუდგენს ფაკულტეტის საბჭოს. დებულებაში შეტანილი ყველა დამატებასა და ცვლილებას ამტკიცებს უნივერსიტეტის აკადემიური საბჭო.